

**Z A K O N**  
**o Vladi Bosansko-podrinjskog kantona Goražde**

**I – OPŠTE ODREDBE**

**Član 1.**

Ovim Zakonom uređuje se organizacija i nadležnosti Vlade Bosansko-podrinjskog kantona Goražde (u daljem tekstu: Vlada Kantona).

**Član 2.**

Vlada Kantona je organ koji obavlja izvršnu vlast Bosansko-podrinjskog kantona Goražde (u daljem tekstu: Kanton) ukoliko određene izvršne nadležnosti Ustavom i drugim zakonima nisu povjerene Premijeru Kantona.

**Član 3.**

Vlada Kantona vrši svoja prava i dužnosti na osnovu Ustava Bosansko-podrinjskog kantona Goražde i Zakona.

**Član 4.**

Sjedište Vlade Kantona je u Goraždu.

**Član 5.**

Unutrašnju organizaciju i način rada, kao i organizaciju, djelokrug i ovlašćenja stručnih i drugih službi koje obavljaju poslove za potrebe Vlade Kantona, ministarstva i drugih organa uprave i ustanova, Vlada Kantona uredit će Poslovníkom Vlade Kantona ili drugim aktom.

**II – NADLEŽNOSTI VLADE KANTONA**

**Član 6.**

Vlada Kantona nadležna je za:

- a) provođenje kantonalne politike, predlaganje i izvršavanje kantonalnih i drugih propisa;
- b) izvršavanje odluka kantonalnih i federalnih sudova i vrše druge nadležnosti povjerenih Kantonu od federalne vlasti;
- c) pripremu prijedloga budžeta Kantona koga usvaja Skupština;
- d) osiguranje saradnje Vlade Kantona i OMBUDSMENA;
- e) nadzor nad kantonalnom policijom;
- f) osiguranje da nacionalna struktura kantonalne policije održava nacionalnu strukturu stanovništva te općine;
- g) vršenje drugih nadležnosti utvrđenih Ustavom Kantona i drugim propisima.

**Član 7.**

Vladu Kantona zastupa Kanton kao pravno lice, ukoliko Ustavom Bosansko-podrinjskog kantona i Zakonom nije drugačije određeno.

Vlada Kantona upravlja imovinom u vlasništvu Kantona ako Zakonom drugačije nije određeno.

### **III – SASTAV I ORGANIZACIJA VLADE**

#### **Član 8.**

Vladu Kantona čine: Premijer Kantona i 8 resornih ministara koji rukovode ministarstvima.

Na čelu resornih ministarstava su:

- ministar za pravosuđe, upravu i radne odnose;
- ministar za privredu;
- ministar za finansije;
- ministar za unutrašnje poslove;
- ministar za socijalnu politiku, zdravstvo, raseljena lica i izbjeglice;
- ministar za urbanizam, prostorno uređenje i zaštitu okoline;
- ministar za obrazovanje, nauku, kulturu i sport i
- ministar za boračka pitanja.

Ministri koji rukovode ministarstvima nemaju zamjenike.

Ministri u kantonalnom ministarstvu mogu se imenovati na tu funkciju ako imaju visoku školsku spremu, koja odgovara djelokrugu i prirodi poslova kantonalnog ministarstva.

Vrsta školske spreme utvrdit će se posebnom Odlukom Skupštine Bosansko-podrinjskog kantona Goražde.

#### **Član 9.**

Kandidat za mjesto Premijera Kantona predlaže ministre.

Ministri zajedno sa Premijerom čine Vladu Kantona.

Vladu Kantona potvrđuje Skupština Kantona većinom glasova.

#### **Član 10.**

Skupština Kantona može izglasati nepovjerenje Vladi.

Vlada podnosi ostavku ako joj u bilo koje vrijeme zakonodavno tijelo Kantona izglasa nepovjerenje.

Premijer Kantona može smijeniti pojedine članove Vlade, što potvrđuje Skupština Kantona.

Premijer Kantona može podnijeti ostavku, što potvrđuje Skupština Kantona.

U slučaju ostavke Premijera Kantona potvrđene od strane Skupštine Kantona razrješavaju se i ostali članovi Vlade.

#### **Član 11.**

Konstitutivni narodi i pripadnici Ostalih bit će proporcionalno zastupljeni u Vladi.

Takva zastupljenost će održavati popis stanovništva iz 1991. godine, do potpune provedbe Anexa 7. u skladu sa članom IX. 11.a. Ustava Federacije.

#### **Član 12.**

Vlada Kantona stupa na dužnost nakon davanja svečane izjave pred Skupštinom Kantona.

#### **Član 13.**

Vlada Kantona ima sekretara Vlade Kantona.

Sekretara Vlade Kantona imenuje i razrješava Vlada Kantona.

Sekretar Vlade je diplomirani pravnik i za svoj rad odgovara Vladi Kantona.

Sekretar Vlade je odgovoran za pravilan i zakonit rad Vlade Kantona.

Nadležnosti Sekretara Vlade propisane su Poslovníkom o radu Vlade Kantona.

#### **IV – NAČIN RADA I ODLUČIVANJA VLADE KANTONA**

##### **Član 14.**

Vlada Kantona radi i odlučuje u sjednicama.

Vlada Kantona može zasjedati i odlučivati ako sjednici prisustvuje više od polovine članova Vlade Kantona.

Vlada Kantona odlučuje većinom glasova prisutnih članova Vlade Kantona.

#### **V – RADNA TIJELA VLADE KANTONA**

##### **Član 15.**

Za razmatranje pitanja iz nadležnosti Vlade Kantona, davanje prijedloga i mišljenja o tim pitanjima, vršenje određenih poslova i zadataka u vezi sa provođenjem zaključaka Kantona, kao i za vršenje drugih poslova, Vlada Kantona može obrazovati stalna i povremena radna tijela, savjete, urede, komisije i dr.

Sastav i nadležnosti radnih tijela, iz stava 1. ovog člana, uredit će se Poslovníkom Vlade Kantona.

##### **Član 16.**

Za donošenje rješenja u upravnom postupku i odlučivanje o drugim pojedinim pitanjima iz ove nadležnosti, Vlada Kantona može obrazovati jednu ili više komisija čije članove imenuje iz reda ministara ili drugih stručnih osoba.

#### **VI – PRAVA I DUŽNOSTI ČLANOVA VLADE KANTONA**

##### **Član 17.**

Premijer Kantona rukovodi radom Vlade i odgovoran je za njen rad, osigurava jedinstvo u izvršavanju poslova iz djelokruga Vlade, usmjerava djelovanje Vlade kao cjeline i članova Vlade pojedinačno.

Premijer kantona predstavlja Vladu Kantona, saziva sjednice Vlade Kantona po sopstvenoj inicijativi ili na prijedlog 5 (pet) članova Vlade Kantona i Skupštine Kantona. Predlaže dnevni red i predsjedava sjednicom.

Premijer Kantona potpisuje akte Vlade Kantona.

##### **Član 18.**

U slučaju odsutnosti ili spriječenosti Premijera Kantona, mijenja ga ministar kojeg odredi Vlada Kantona svojom odlukom.

##### **Član 19.**

Članovi Vlade Kantona imaju pravo i dužnost da predlažu pretresanje pojedinih pitanja na sjednici Vlade Kantona, učestvuju u pretresanju i odlučivanju o pitanjima po kojima se raspravlja na sjednicama Vlade Kantona, pripremaju zakone i druge propise iz nadležnosti Vlade Kantona i druge akte koja Vlada Kantona donosi, učestvuju u radu radnih tijela Vlade Kantona i vrše i druge poslove iz nadležnosti Vlade Kantona, u skladu sa Poslovníkom i zaključcima Vlade Kantona.

## **Član 20.**

Članovi Vlade Kantona mogu predložiti Vladi Kantona da zauzme stav po pitanjima koja su od značaja za provođenje utvrđene politike i izvršavanje zakona i drugih propisa i opštih i pojedinačnih akata.

## **Član 21.**

Članovi Vlade Kantona su odgovorni za zastupanje i provođenje zaključaka Vlade Kantona u poslovima koje im Vlada Kantona povjeri, kao i za blagovremeno pokretanje inicijative, za rješavanje pitanja u okviru zadataka koje im je povjerila Vlada kantona.

## **Član 22.**

Članovi Vlade Kantona, određeni da učestvuju u radu drugog organa i tijela, dužni su postupati u skladu sa ovlaštenjima, smjernicama i stavovima Vlade Kantona.

Članovi Vlade Kantona su dužni svoju aktivnost ostvariti tako da, pored poslova za koje su lično zaduženi, prate pitanja iz djelokruga Vlade Kantona za koja nisu lično zaduženi i da svojim prijedlozima i mišljenjima doprinose odgovornom, zakonitom i efikasnom radu Vlade Kantona.

## **Član 23.**

Članovi Vlade Kantona ne mogu biti građanski odgovorni za bilo koji postupak izvršen u okviru njegovih dužnosti u izvršnim organima Kantona.

## **VII – AKTA VLADE KANTONA**

### **Član 24.**

U ostvarivanju svojih ovlaštenja, utvrđenih Ustavom i Zakonom Vlada Kantona donosi: uredbе, odluke, rješenja, zaključke i druge propise iz svoje nadležnosti.

U izuzetnim slučajevima, kako je to propisano Ustavom Bosansko-podrinjskog kantona Goražde, Vlada može donositi propise iz nadležnosti Skupštine Kantona..

### **Član 25.**

Uredbom se uređuju najvažnija pitanja iz nadležnosti Vlade Kantona, bliže uređuju odnosi za sprovođenje zakona, obrazuju stručne i druge službe Vlade Kantona i utvrđuju načela za unutrašnje ustrojstvo organa Kantona.

Odlukom se uređuju pojedina pitanja ili propisuju mjere Vlade Kantona, daje saglasnost ili potvrđuju akta drugih organa i ustanova i odlučuje o drugim pitanjima koja se ne regulišu uredbom.

Rješenjem se odlučuje o imenovanjima i razrješenjima kao i o drugim pojedinim pitanjima iz nadležnosti Vlade Kantona.

Zaključkom se utvrđuju stavovi po pitanjima koja su od značaja za sprovođenje utvrđene politike, uređuju unutrašnji odnosi u Vladi Kantona i određuju zadaci organima i službama, kao i radnim tijelima Vlade i Kantona.

Zaključkom se odlučuje i u drugim slučajevima u kojima se ne donose druga akta.

### **Član 26.**

Uredbe i druga akta Vlade Kantona obavljaju se u skladu sa Poslovníkom Vlade Kantona.

## **VIII – JAVNOST RADA VLADE KANTONA**

### **Član 27.**

Rad Vlade Kantona je javan.

Vlada Kantona obavještava javnost o svom radu, zaključcima i zauzetim stavovima, kao i o drugim značajnim pitanjima koja su razmatrana ili koja će se razmatrati na sjednici Vlade Kantona.

Javnost rada Vlade Kantona osigurava se redovnim obavještavanjem javnosti i omogućavanju prisustva novinara na sjednici Vlade Kantona i njenih radnih tijela, davanja saopštenja za štampu, vođenjem razgovora sa predstavnicima javnog informisanja, dostavljanjem pisanih materijala sredstvima javnog informisanja ili na drugi pogodan način.

### **Član 28.**

Vlada Kantona određuje koji se materijali ili podaci, sa njene sjednice ili sjednice njenih radnih tijela, ne mogu objavljivati, niti stavlјati na raspolaganje predstavnicima sredstvima javnog informisanja trajno ili na određeno vrijeme.

### **Član 29.**

Ukoliko za to postoje opravdani razlozi Vlada Kantona može odlučiti da se sjednica, u cjelini ili njen dio, održi bez prisustva javnosti.

## **IX – STRUČNE I DRUGE SLUŽBE VLADE KANTONA**

### **Član 30.**

Za vršenje stručnih, tehničkih i drugih poslova za potrebe Skupštine Kantona i njenih radnih tijela, za Vladu Kantona i njena radna tijela i za potrebe ministarstva i dr. organa uprave Vlada Kantona može obrazovati zajedničku stručnu službu i po potrebi druge službe.

Aktom o obrazovanju, zajedničke stručne službe, utvrdit će se njen djelokrug, položaj i odgovornost svih zaposlenih i broj lica koje njima rukovode.

### **Član 31.**

Vlada Kantona vrši nadzor nad radom zajedničke stručne službe koju obrazuje.

Načelnik Službe rukovodi zajedničkom službom i odgovoran je za njen rad, te vrši druge poslove utvrđene Poslovníkom o radu Vlade i poslove koje mu odredi Premijer.

Načelnika službe imenuje i razrješava Vlada Kantona.

## **X – PRELAZNE I ZAVRŠNE ODREDBE**

### **Član 32.**

Vlada Kantona je dužna donijeti Poslovník o svom radu u roku od 30 dana od dana stupanja na snagu ovog Zakona.

### **Član 33.**

Dok Vlada ne donese Poslovník u roku iz člana 32. ovog Zakona primjenjivat će se ranije donijet Poslovník o radu Vlade Kantona.

**Član 34.**

Stupanjem na snagu ovog Zakona prestaje da važi Zakon o Vladi Bosansko-podrinjskog kantona Goražde („Službene novine Bosansko-podrinjskog kantona Goražde“, br. 3/97 i 17/00).

**Član 35.**

Ovaj Zakon stupa na snagu danom objavljivanja u „Službenim novinama Bosansko-podrinjskog kantona Goražde“.

Broj:01-02-366/03.  
10.06.2003.godine  
G o r a ž d e

PREDSJEDAVALAČ  
dr. Alija Begović,s.r.